

Angajoqqaarsiat aamma ilaqutariit oqilisaasut meeqqanut paarisaminnut ilaqutaanngitsut minnerpaamik 25-nik ukioqalereersimanissaat aalajangersaaffigeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Astrid Fleischer Rex, Demokraatit)

Akissuteqaat

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

Aappassaaneerpeqarnera

Ilaqutariinnermut Peqqissutsimullu Ataatsimiititaliaq, aalajangiiffigisassatut siunnersuut una peqqissaartumik suliarisimagassiuk qujanaq.

Meeqqanik inuusuttunillu ikiorsiisarneq pillugu Namminersornerullutik Oqartussat nalunaarutaanni nr. 32, 14. december 2006-imeersumi § 13-imi tunngavissamik amigaateqarneq Ataatsimiititaliap tikkuarppaa. Tassunga tunngatillugu oqaatigineqassaaq Naalakkersuisut ajornartorsiut arajutsisimanngimmassuk, mannaluk tikillugu aaqqiissuteqartoqarsimannginnera ajuusaarutigimmassuk.

Oqaatigineqassaaq meeqqanik inuusuttunillu ikiorsiisarneq pillugu nutaamik inatsisiliornissami ilaqutariit paarsaqartartut pillugit inassuteqaatit il.il. ilanngunneqarumaarmata. Meeqqanik inuusuttunillu ikiorsiisarneq pillugu inatsisissatut nutaatut siunnersuut UPA 2013-imi saqqummiunneqassaaq. Ilaqutariit paarsaqartartut meeqqat paarsarisamik pisariaqartitaannik isumaginninnissamut piukkunnaateqartuunissaat qulakkeerniarlugu ilaqutariit paarsaqartartut pillugit maleruagassat ilaatigut sukaterneqassapput.

Ilaqutariit paarsaqartartut pillugit misissuineq Naalakkersuisut iluarisimaartorujussuuat, aammalu inassutigineqartut meeqqanik inuusuttunillu ikiorsiisarneq pillugu nutaamik inatsisissap suliarineqarnissaani ilanngunneqarnissaat eqqumaffigereerlugu. Pilersaarusiorterulli ingerlaqqinnissaani kommunit KANUKOKA-lu qanimut suleqatigineqassapput. Aamma iliuusissatut pilersaarusiassap tunngavissarissaarluni suliarineqarsinnaanera qulakkeerumallugu annertunerusumik misissuinissaq ilaatigut pisariaqarpoq.

Oqaatigineqassaaq ilaqutariinnik paarsaqartartunik piukkunnarsaasarneq maanna ingerlanneqalereermat. Nunatsinni illoqarfiit tamangajaasa pikkorissaanermik ataatsimik-marlunnik ukiumi 2009-miit 2011-mut ingerlatsivigineqarput. AIAA-mik (Angajoqqaarsiaarsiorneq, Ilinniartitaaneq, Akuersissuteqarneq, Aaqquissuussineq) arlaleriarluni pikkorissartitsisoqarpoq, aamma ilaqutariinnut paarsaqartartunut kommunini siunnersortit, ilaqutariit paarsaqartartut aammalu ilaqutariit paarsaqartartut pillugit attuumassuteqartut allat ilaqutariit paarsaqartartut pillugit misilittakkat siunissarlu pillugit ukioq manna 4.-6. decemberimi nuna tamakkerlugu pikkorissaanissamut isumasioqatigiissitsinissamullu qaaqquneqassapput.

Kommunit, aningaasaqarneq pissutigalugu aaqqiissutinik ajornernik toqqaanngikkaluarlutik eqqortumik piffissaatillugulu inissiisarnissaat qanoq qulakkeerniarneqarnersoq Ataatsimiititaliap nassuiaqquaa.

Kommunip ikiorsiissutissaq meeqqat inuusuttulluunniit ataasiakkaat pisariaqartitaannut naapertuunnerpaaq, inatsisartut peqqussutaat atuuttoq naapertorlugu tamatigut toqqagassaraat. Meeqqap inuusuttulluunniit pisariaqartitsinera apeqqutaatillugu meeraq inuusuttorluunniit inissinneqassatillugu kommunip aningaasaqarneq aalajangiisuutittussaanngilaa.

Kommunit aningaasaqarniarnertik pissutigalugu meeqqanik inuusuttunillu angerlarsimaffiup avataanut inissiisanninnerat arlaatigut pasinartoqarnersoq kommuninik nakkutilliinermi eqqumaffigineqartarpoq. Taamaattoqarnera pasitsaanneqassagaluarpat nakkutilliisut soorunami erngerlutik qanoq iliuuseqartussaapput.

Ataatsimiititaliap ulloq-unnuarlu paaqqinniffinni inissat pillugit nalunaarusioqqusineranut atatillugu Naalakkersuisut ataatsimiititaliamut allakkatigut akissuteqassapput.

Paarsinermut atatillugu meeqqanik pinerliisimanninnermut uppersaatinik pissarsinissamut tunngasumik naliliinerugallartumik saqqummiussisoqarnissaa Ataatsimiititaliap qinnutigaa.

Meeqqanik pinerliisimanninnermut uppersaatiit ilaqtariinnik paarsaqartartunik akuersissuteqartarnermi piumasaqaataanissaasa pingaartuuneranik Ataatsimiititaliap oqarnera Naalakkersuisut isumaqatigaat. Inatsisiliornissamut atatillugu nalunaarummik, ilaqtariit paarsaqartartut piginnaatitaaffiik, tassungali ilutigitillugu aamma ilaqtariinnik paarsaqartartunik akuersissuteqartarnermi piumasaqaatiit erseqqissarneqarnerannik paatsuugassaannigitsunik aalajangersaaffiusumik inatsit tunngavigalugu atuutilersitsinissaq pilersaarutaavoq.

Naalakkersuisut naatsumik oqaatigissavaat angerlarsimaffiup avataanut inissiisarnerup pinaveersaartinneqarnissaa, kiisalu meeqqap pisariaqartitsinera naapertorlugu angerlarsimaffiup avataanut inissiisoqartariaqartillugu sullissinerup pitsaanerunissaa suliallu pilertornerusumik pisarnissaa siunertaralugit suliniuterpasuit, ulloq unnuarlu paaqqinnittarfiit pillugit misissuineq, ilaqtariit paarsaqartartut pillugit misissuineq soorlulu aamma Meeqqanut Inuusuttunullu Periusissiaq tunngavigalugit aallartinneqareermata. Ilaqtariit paarsaqartartut Meeqqanut Inuusuttunullu Periusissiami iliuuseqarfigineqartussanut ilaapput, pisariaqartitsinerullu allaaserineqarnissaanut aningaasanik immikkoortitsisoqareerpoq.

Aammali iliuuseqarnerunissaq Naalakkersuisut eqqumaffigaat, meeqqammi inuusuttullu angerlarsimaffiup avataanut inissinneqartartut tassaapput inuiaqatigiinni uagutsinni mianersuuttarialerujussuit.

Angajoqqaarsiatut akuerineqarnissami 25-nik ukioqalereersimanissap najoqqutassatut piumasaqaataanissaa Naalakkersuisut isumaqatigaat, tamannali meeqqanik inuusuttunillu ikiorsiisarneq pillugu inatsit nutaaq tunngavigalugu nalunaarutikkut aalajangersarneqartariaqarsoraat, tassami nalunaarut akuerineqarnissamut piumasaqaatinik allanik aamma aalajangersaaffiusussaassammat.

Naalakkersuisut taamatut oqaaseqarlutik allannguutissatut siunnersuutip akuersissutigineqarnissaa inassutigaa.